

AUGLÝSING

um skráningu farmflytjenda á innfluttum vörum og skil á farmskrám.

Í tengslum við tölvuvinnslu tollskjala sem hafin verður við embætti tollstjóra í Reykjavík frá og með 1. janúar 1988 og síðar við önnur tollembætti verður sérstök skráning tekin upp á öllum innfluttum vörum samkvæmt eftirfarandi reglum:

1. gr.

Farmflytjendur skulu frá og með 1. janúar 1988 gefa öllum vörusendingum sem þeir flytja til landsins sérstakt sendingarnúmer sem innflytjendur eiga að tilgreina í aðflutnings-skýrslu.

Sendingarnúmerið skulu farmflytjendur tilgreina í farmskrá við hverja vörusendingu sem flutt er til landsins, undir sérhverju farmskrárnúmeri sem sjálfstæð vörusending, til aðgreiningar frá öllum öðrum sendingum sem flutningsfar flytur til landsins í sömu ferð.

2. gr.

Sendingarnúmer er 19 stafa tala sem greinist í átta þætti sem hér segir:

Til skýringar er sendingarnúmerið sýnt hér samsett úr 19 bókstöfum, sem skipt er upp í átta bókstafapætti sem hafa hver sína merkingu, þ.e. A-BBB-CCCC-D-EE-FFF-GGGG-H.

1. **A = Farmflytjandi.** Hvert skipafélag eða flugfélag skal hafa ákveðið tákn. Smærri farmflytjendur (t.d. fiskiskip) skulu þó vera nokkrir saman um tákn. Táknnum úthlutar ríkistollstjóri samkvæmt beiðni viðkomandi farmflytjanda.
2. **BBB = Flutningsfar.** Skammstöfun fyrir flutningsfar er þrjú stafir, bókstafir eða tölustafir. Farmflytjendur skulu ákveða sínar skammstafanir sjálfir og nota alltaf eina og sömu skammstöfunina fyrir sama flutningsfar óháð skammstöfunum hjá öðrum farmflytjendum. Innlendir farmflytjendur og umboðsmenn erlendra farmflytjenda skulu tilkynna ríkistollstjóra um þær skammstafanir sem orðið hafa fyrir valinu. Ríkistollstjóri mun hins vegar úthluta smærri farmflytjendum skammstöfun fyrir flutningsför þeirra.
3. **CCCC = Komudagur.** Fyrstu tveir bókstafirnir tákna mánaðardag en tveir þeir síðustu tákna mánuðinn. Liggi komudagur ekki fyrir skal áætla hann.
4. **D = Ár.** Tilgreina skal síðasta tölustaf viðkomandi árs.
5. **EE = Hleðsluland.** Tilgreina skal með skammstöfun samkvæmt LOCODE (staðall Sameinuðu þjóðanna) viðkomandi hleðsluland. Tollstjórar skulu veita farmflytjendum upplýsingar um staðal þennan samkvæmt nánari fyrirætlum ríkistollstjóra.
6. **FFF = Hleðslustaður.** Tilgreina skal með skammstöfun samkvæmt LOCODE-staðli síðasta hleðslustað vegna flutnings vöru til landsins.
7. **GGGG = Númer sendingar** (farmskrárnúmer vegna skipsfarms en innfærslunúmer í innfærslubók flugfélaga vegna flugfarms). Tilgreina skal töluröð sendingar innan hleðslustaðar fyrir hverja ferð.
8. **H = Til prófunar.** Aðeins þeir farmflytjendur sem vinna farmskrár í tölvum þurfa að rita þessa tölu eða bókstaf.

3. gr.

Farmflytjendur sem vinna farmskrár sínar í tölvum skulu, auk skriflegrar farmskrár, skila þeim í tölvutæku formi til embættis ríkistollstjóra samkvæmt nánari fyrirætlum sem ríkistollstjóri setur. Aðrir farmflytjendur skulu afhenda viðkomandi tollstjóra skriflega farmskrá í tvíriti yfir vörur sem eru á skrá til tollumdæmis hans. Í þeim skulu vörusendingar auðkenndar með sendingarnúmeri skv. 2. gr.

4. gr.

Farmflytjendur skulu tilgreina sendingarnúmer í flutningsgjaldsreikningum sem þeir gefa út vegna viðkomandi vörusendingar.

5. gr.

Tollstjórar skulu frá og með 1. janúar 1988 skila farmskrám til embættis ríkistollstjóra, endurskoðunardeildar. Farmskrám skal skilað innan viku frá því að flutningsfar tók höfn. Tollstjórar skulu skila aðflutningsskjölum vegna tollafgreiðslu á vörum innan viku frá tollafgreiðsludegi.

6. gr.

Auglýsing þessi sem sett er samkvæmt heimild í 148. gr. tollalaga nr. 55, 30. mars 1987 öðlast þegar gildi.

Fjármálaráðuneytið, 17. desember 1987.

F.h.r.

Indriði H. Þorláksson.

Guðrún Ásta Sigurðardóttir.

AUGLÝSING

um tryggingarfé ferðaskrifstofa.

Með heimild í 18. gr. laga nr. 79, 2. júlí 1985, um skipulag ferðamála, hefur ráðuneytið ákveðið að bankatrygging sú sem setja verður vegna reksturs ferðaskrifstofa skuli eigi vera lægri en 4,0 millj. kr. frá birtingu þessarar auglýsingar að telja.

Handhöfum gildandi ferðaskrifstofuleyfa er þó veittur frestur til 31. janúar 1988 til að auka tryggingarfé sitt.

Samgönguráðuneytið, 16. desember 1987.

Matthías Á. Mathiesen.

Ólafur Valdimarsson.

AUGLÝSING

um staðfestingu á söluumboðseyðublaði Félags fasteignasala.

Hér með staðfestir ráðuneytið samkvæmt 3. mgr. 2. gr. reglugerðar nr. 520/1987, sbr. 9. gr. laga um fasteigna- og skipasölu nr. 34/1987, eyðublað fyrir söluumboð sem Félag fasteignasala hafa látið gera og birt er sem fylgiskjal með auglýsingu þessari.

Dóms- og kirkjumálaráðuneytið, 14. desember 1987.

F. h. r.

Þorsteinn Geirsson.

Jón Thors.